



Cumiau ed engraziament da Gaudenz Hendry - Canepa

Nies frar Gaudenz ei naschius ils 7 d'october 1947 egl idillic uclaun da Cavorgia.

Ils geniturs Gaudenz e Sabina ein maridai igl onn 1943 e habitavan en casa nova baghegiada ensemen cugl aug Benedetg.

Cun treis soras e treis frars era il Gaudenz il secund vegl dils buobs. Nus havein passentau ina biala affonza en simplas relaziuns en ina famiglia purila, denton sch'ins less dir sin la vart sulegliva. La scola primara vegneva frequentada a Cavorgia, ferton ch'ils 3 onns en scola secundara er'ei da prender la via sut ils peis e serender da tuttas nevadas tras Claus e las Vals viers Sedrun.

La stad durant ils onns da scola ei il Gaudenz staus caverer da Rueras e lu



en differentas alps sco starler pign, tersiel e paster. Finius il temps da scola, sedecida il trapassau pil mistregn da mecanist da maschinas. Las pusseivladads per tal emprendissadi tier nus en la regiun eran lu fetg limitadas. El bi marcau da Soloturn anfla el lu l'adattada firma per far siu emprendissadi che ha cuzzau 4 onns. Tier la firma Escher Wyss da Turitg serenda el lu cuort suenter tal. Quella nova piazza porscha lu ad el la pusseivladad da saver ir sin viadi en differentas tiaras e continents per reparar ni metter en funcziun las maschinas furnidas. Da quella piazza ed experientschas raquintava el savens en la quala el ei lu staus in tshuppel onns.

Silsuenter preferescha el lu da bandunar ils gronds marcaus e serender el Tessin, nua ch'el entra ella piazza tier la firma TOSHIBA/OZALID. Leu era el responsabels en la regiun per la vendita e manteniment da differentas maschinas sco fotocopiaders d'industria.

En quei temps empren el d'enconu-scher sia cara consorta Carla da Mezzo-vico. Igl onn 1978 maridan els e baghe-gian ina casa nova. Il plascher pils ge-niturs ei naturalmein la naschientscha da dus buobs ed ina buoba che han purtau legria e satisfacziun.

Ils buns contacts culs vischins sco era en vischnaunca eran pil Gaudenz da zun gronda impurtonza. Ins ha lu spert clamau el en differentas uniuns da cant, per la scola ed era da segidar cun la pleiv. Plirs onns s'engascha el sco cusseglier da vischnaunca ed era com-member dalla cumissiuun da gestiun dalla vischnaunca.

Cun strusch 40 onns banduna el suen-ter plirs onns igl engaschi tier la firma OZALID/TOSHIBA e vegn elegius tier la viafier federala. Havend frequentau duront pli che dus onns la scolaziun e practica entra el ella nova piazza sco manischunz da locomotivas a Bellin-zuna. Siu grond siemi da transportar ils passagiers tras il Gottard e viers l'Italia ei staus per el realitad. Quei mistregn ha dau ad el gronda satisfacziun sper gronda responsabladad entochen sia pensiuun.

Siu temps liber era adina dedicaus a sia cara famiglia. Savens era tala a Ca-vorgia en lur casa da vacanzas e lu prin-cipalmein si Mises grond en sia tegia e clavau. Tuts enconuschevan oravontut fetg bein la Val Gierm e la Reada ed ils loghens nua ch'ei deva savurus izuns e farbuns ed ils rovens da bulius.



Cun gnanc 70 onns ha ins deplora-blamein constatau la diagnosa da de-mens, ina gronda frida per la famiglia. Cun gronda ed exemplarica tgira, ca-rezia e pazienza han sia cara dunna e famiglia ensemen cun la Spitex accum-pignau e tgirau il bien Gaudenz e quei adina a casa duront varga tschun onns. Ils 14 da fevrer ein lu sias davosas for-zas sminuidas e suenter gnanc dus dis ei il car frar sedurmentaus el spital da Lugano.

In special engraziament a tuts amitgs ed enconuschents per las numerusas cartas e cordials plaids da consolaziun che la famiglia ha astgau retscheiver.

En num dalla cara famiglia sco era da mes fargliuns

*Wendelin Hendry*